

及失財產不造惡 兄今當知我奉事 願以持戒而取死 不以犯戒而取生
何故應當為一生 而可放逸作惡行 生死之中莫放逸 我於生死作不善
遭值惡友造非法 得遇善友以斷除 佛入宿命知了說 告諸比丘是本偈
爾時大達是我身 優波大達是阿難 當知爾時屯度脾 即是提婆達多身
比丘當知作是學 是名集法總攝說 宜廣慎行應恭敬 諸比丘僧修是法

三〇、提婆達多欲毀傷佛因緣

佛在王舍城。告提婆達多言。汝莫於如來生過患心。自取滅損。得不安事。自受其苦。
諸比丘言。希有世尊。提婆達多於如來所。常生惡心。世尊長夜。慈心憐愍。柔軟共語。佛言。
不但今日。乃往過去。迦尸之國。波羅捺城。有大龍王。名為瞻蔔。常降時雨。使穀成熟。十四
日十五日時。化作人形。受持五戒。布施聽法。時南天竺國。有咒師來。豎箭結咒。取瞻蔔龍
王。時天神語迦尸王言。有咒師將瞻蔔龍王去迦尸國。王即出軍眾而往逐之。彼婆羅門。

便復結咒。使王軍眾都不能動。王大出錢財。贖取龍王。婆羅門。第二更來咒取龍王。諸龍眷屬興雲降雨。雷電霹靂。欲殺婆羅門。龍王慈心語諸龍眾。莫害彼命。善好慰喻。令彼還去。第三復來。時諸龍等即欲殺之。龍王遮護。不聽令殺。即放使去。爾時龍王。今我身是也。爾時咒師者。提婆達多是也。我為龍時。尚能慈心。數數救濟。況於今日。而當不慈。

三二一、共命鳥緣

佛在王舍城。諸比丘白佛言。世尊。提婆達多是如來弟。云何常欲怨害於佛。佛言。不但今日。昔雪山中有鳥名為共命。一身二頭。一頭常食美果。欲使身得安隱。一頭便生嫉妒之心。而作是言。彼常云何。食好美果。我不曾得。即取毒果食之。使二頭俱死。欲知爾時食甘果者。我身是也。爾時食毒果者。提婆達多是。昔時與我共有一身。猶生惡心。今作我弟。亦復如是。